

東
華
續
錄

東華續錄

同治五十二

臣王先謙敬編

臣張式恭恭校

冬十月壬辰朔諭軍機大臣等劉坤一奏湘軍追殺竄賊定南龍南擊退撲城股賊並精毅營扼剿大勝一摺逆匪由青龍等墟竄後王開琳一軍復追及於白水渡斬馘千餘其前股竄至天花寺下厯墟圍攻橫岡營城並分股直撲定南廳城經同知王大枚會督兵勇擊敗斬擒甚多餘逆悉竄龍南徑撲縣城復爲知縣王家傑等會軍擊退席寶田先期馳抵賴南鐵石口一帶扼剿連日督軍鏖戰汪逆背受矛傷幾被擒獲並殲除悍賊萬餘該逆再竄龍南圍攻縣城復經官軍出剿該逆精銳殆盡見在賊眾不過三萬餘人復由江西敗回粵境展轉於永和連平境上勢已萬分竄

蹙亟應會集諸軍實力兜剿爲一股聚殲之計著左宗棠仍遵二十八日諭旨迅赴江西擇要駐紮居中調度檄飭各軍剋期會剿並著劉坤一飛檄席寶田王開琳等軍越境進攻乘勝痛擊迅殲醜黨該逆自鎮平克復後從西南折竄長甯閩軍窮追數晝夜而粵東曾未聞有一騎一卒躡賊追剿殊屬玩延此次該逆被擊勢窮復由江竄入粵境餘眾尙有三萬餘人難保不鋌而走險復逞狡謀瑞麟郭嵩燾既無會剿之師嚴扼邊境豈得復以驅賊入粵爲解諉過鄰封著瑞麟郭嵩燾嚴飭粵東在防諸軍與江閩官軍相機聯絡協力夾擊務將此股竄匪悉數殲除以靖地方儻不能實力堵截致該逆深入腹地復行蔓延瑞麟等自問當得何罪將此由六百里各諭令知之○諭崇實駱秉章奏周達武所部未能抽撥請調湘果等營赴陝等語周達武一軍見已深入松潘夷巢

勢難抽撥著照崇實等所請卽飭蕭慶高所部之湘果數營並見
紫褒沔一帶之彝字三營趕緊起程剋期前進見在陝西邊防已
鬆而甘省軍事方亟著趙長齡劉蓉於蕭慶高等拔營催令取道
入甘歸楊岳斌調遣以資得力正在寄諭間據楊能格奏逆回窺
伺慶環大股分撲狂竄經魏添應等督軍剿擊連次獲勝克復西
峯曲子兩鎮並廟家河等寨惟逆眾數萬竄撲慶陽此次以少勝
多仍恐去而復來著楊岳斌妥籌兼顧並飭令楊能格督率在防
兵將認真防守毋稍疏懈又據聯捷奏近日與賊接仗獲勝情形
並列保博多洪武等多員又奏移軍靜甯辦理招撫潰勇事宜並
雷正綰咨送楊能格摺稟差吳錫齡到營聞有句結回目情事等
摺片聯捷以奉旨出關之員不思前進輒藉詞招撫潰勇移軍靜
甯時而剿賊時而議撫不知所稱剿賊立功各員果實有其事否

本日已批飭該員卽日出關著楊岳斌確切查明如果獲勝屬實再行奏乞恩施雷正綰所部見已安輯如零星潰勇尙有在外滋事者著楊岳斌責令雷正綰妥爲辦理毋得自貽伊戚馬化澂是否有勾結情事並著查明具奏聯捷摺片四件著鈔給楊岳斌閱看將此由五百里各諭令知之○伊犁參贊大臣聯捷奏親督各隊剿匪獲勝懇恩將出力人員獎勵得旨聯捷屢經有旨催令出關該大臣輒藉詞剿辦甘肅回匪遂其遷延不進之計實屬疲玩著懷遵前旨迅將經手事宜咨交楊岳斌辦理剋日整隊由甘肅一路會同成祿出關不准再以甘肅軍情拉雜入奏以圖飾聽懷之○以江西剿匪獲勝予總兵官龔繼昌一品封典並陣亡參將榮光貴等祭葬世職○癸巳諭軍機大臣等劉蓉奏堵剿逆回獲勝涇長情形稍鬆追剿陶營叛卒擒獲首犯殲斃悍黨餘匪悉數

遣散楊得勝等軍暫留延鄜嚴防三岔廳等處各摺片甘省逆回盤踞新城黨原兩鎮分股由豐臺擾及長武等處經譚玉龍等帶隊截擊雷正綰所部亦各奮勉圖報堵其竄路該逆復撲涇河川又經譚玉龍等克之敗匪一股退竄鎮原一股退竄蕭鎮其新城大股亦退回固原及炭山等處荔家堡之賊亦由蕭鎮北竄該逆因陝省邊防嚴密不能遂其東竄狡謀旋即逡巡敗退著楊岳斌趙長齡劉蓉督飭周顯承等會合陝軍乘勝進攻分路躡剿務將此股竄回就地殲除毋令再行闖入陝疆陶茂林營叛卒經蕭德揚等在郝坪等處分路進剿將首逆王正明等擒獲著趙長齡劉蓉卽飭將王正明等犯解省訊明正法以昭炯戒其遣散餘眾並著妥爲辦理毋令沿途滋生事端此次追剿叛卒出力之員弁等著准其彙入彭體道等勦辦潰卒案內擇尤保奏楊得勝鄆太愚

兩軍既據劉蓉奏稱撤赴慶陽則延鄜門戶空虛卽著照所請暫
畱延鄜防堵毋庸撤赴慶陽歸楊能格調遣以固藩籬劉蓉見派
譚玉龍赴甘跟剿著楊能格督飭見有兵力會合譚玉龍等軍將
此路竄匪兩面夾擊迅殄逆氛甘肅潰勇竄至三岔應叛將胡大
貴所部千餘人擾及秦州著趙長齡劉蓉督飭防軍實力堵剿楊
岳斌一面派兵會擊毋任蔓延爲患雷正綰當懷遵疊次寄諭將
胡大貴等設法擒斬以贖前愆劉蓉患病請俟趙長齡抵陝後交
卸就醫見在甘省逆回叛勇紛紛潰竄陝省邊防緊要劉蓉所部
各營必須有得力統將嚴明約束足保無虞劉蓉方可卸責所有
布置情形及一切應辦事宜著劉蓉與趙長齡悉心會商務期諸
臻妥協方准起程不得急圖交卸致有貽誤將此由五百里諭知
楊岳斌趙長齡劉蓉並傳諭楊能格雷正綰知之○以邊外馬賊

嘯聚諭長善嚴飭各口守禦○以捐餉濟軍賞阿拉善親王貢桑
珠爾默特子喇嘛扎拉穆沁旺濟勒諾們罕名號台吉巴拉沁班
咱爾廓察鎮國公銜○甲午命前任太僕寺少卿徐繼畲以三品
京堂候補在總理各國事務衙門行走○乙未諭軍機大臣等官
文等奏擊退襄棗竄匪楚軍出境會剿吳昌壽奏南路之賊竄擾
魯山請將大名駐防馬隊調赴河南各一摺張總愚股匪闖入襄
棗境內經江長貴等軍擊退姜玉順等軍復由新野回剿賊勢不
支急竄裕州賒旗店等處又經豫軍截擊該逆折竄魯山縣境駛
向西北勢將擾及嵩洛此股賊匪往來楚豫之交趨向靡定必須
合兩省兵力聯絡夾擊方能得手官文鄭敦謹仍當嚴飭姜玉順
譚仁芳等視賊所向統兵前進會合豫軍相機兜剿並檄劉維楨
之軍迅由棗陽前赴豫境策應不得以賊已出境稍存畛域之見

吳昌壽已派馬德昭率所部馳赴河洛張學醇等軍由襄邲繞赴汝州截擊卽著督飭各軍探明賊蹤實力痛剿迅殄逆氛賴牛各逆前由曹單一路竄往蕭碭境內曾國藩自己設法布置近日剿辦情形若何仍著詳細具奏以慰廑念其西路股匪亦當妥籌兼顧以期萬全豫省馬隊太單見在直隸河防漸鬆所有副都統安住所帶馬隊卽著劉長佑飭令統帶赴豫交吳昌壽調遣官文另片奏鮑超一軍業已起程赴江仍請催令前進等語朝廷因豫南軍情緊要是以改調鮑超一軍就近由楚赴豫嗣據曾國藩奏到亦有鮑超一軍調赴豫省於粵無損於豫有益之語茲覽官文所奏以上杭霆軍降眾太多心志不一並未帖然畏服儻聞鮑超畱楚赴豫之信紛紛而來諸多窒礙所見亦是卽著官文傳知鮑超仍卽馳赴江西將所部新舊各軍妥爲部勒相機進兵仍聽左宗

策節制所有該軍餉需仍著劉坤一源源撥解毋令缺乏將此由
六百里諭令知之○諭都興阿穆圖善奏雷營兵變布置防範情
形及請飭晉省籌銀採辦米石楚勇兩營難再撤回各摺片雷正
綰所部潰變後該提督不肯從逆屢思自盡隨時將潰勇設法招
集撫定折回固原接據劉蓉楊能格等奏到已准令該提督單銜
奏事都興阿等所奏尙係前此未確之信是目下情形較爲安定
都興阿等見已抽撥西蒙克西克兩起馬隊赴陝則涇州一帶尙
可藉資防剿安住所帶馬隊本日已准吳昌壽奏調赴豫剿捻勢
難改令赴陝都興阿等當飭令西蒙克西克相機剿辦以遏回氛
並隨時知照劉蓉妥籌堵禦段登雲一軍見擬調援慶陽甯夏東
路既慮空虛卽著桂成酌帶蒙兵就近移紮花馬池以壯聲勢都
興阿等仍當激勵將士規取甯夏郡城毋稍鬆勁甘省糧食缺乏

軍士嗷嗷待哺困苦已極都興阿已派色楞額馳往歸綏守催倉穀兼籌採辦運解自係迫不可緩之事著王榕吉趕緊籌撥銀二萬兩交歸綏道儘數採辦米石迅速運解以濟兵食此項銀兩准於山西月撥都興阿軍餉項下分月陸續扣還並著德勒克多爾濟就近督令歸綏道將此項米石設法採辦刻卽運解不得藉口推諉致誤要需至都興阿所部見在分撥援剿兵力已單袁復清一營駐紮甯夏城北羅承勳一營駐紮定邊縣境皆關緊要卽著毋庸調回山西王榕吉惟當會同陳湜就見有兵力妥爲布置以固邊防將此由六百里諭知都興阿穆圖善德勒克多爾濟桂成並傳諭王榕吉知之○諭前據御史汪朝榮奏參伊犁參贊大臣聯捷沿途需索逗畱並劉蓉摺內所稱聯捷在沿途勒折錢文例外需索各節疊經降旨交楊岳斌詳查具奏茲據劉蓉奏稱聯捷

統帶兵勇赴甘援剿經過陝西州縣節節逗留任意勒索騷擾致令員弁兵勇倚勢作威該營委員降調縣丞懋德在長武逗留三日捏報勇數冒支口糧並串通都司曹鶴先譌詐威逼曹鶴先明知勇丁竊取餉銀轉喝令隊伍持械勒令長武縣知縣張景福賠銀一千兩懋德已經聯捷咨令回旗曹鶴先見回涇州請俟防務鬆後由趙長齡提案審辦各等語案關委員冒領勇糧並帶兵官縱令部勇盜取官銀匿案賠贖虛實俱應嚴切根究以成信讞卽著楊岳斌趙長齡彙入汪朝榮劉蓉前參聯捷沿途需索各節一併確切查明據實具奏毋稍徇隱原片著鈔給閱看本日據官文等奏稱探聞甘肅潰勇入陝陝軍在寶雞口接仗失利陝省已飛撤武關商南防兵回省堵禦各等情此事尚未據劉蓉奏報是否實有其事著劉蓉迅速查明具奏據訥爾濟奏稱戶部議准撥解

巴里坤銀兩至今未到請飭陝甘總督解由殺虎口經綏遠城直達烏里雅蘇台備撥或徑由殺虎口先行撥解等語卽著楊岳斌查明如道路業已疏通卽將應解巴里坤餉銀由甘省迅速解往如道路梗阻卽著改道由殺虎口草地一路解至烏城以應急需毋稍延緩所請先由殺虎口監督先行撥解之處並著楊岳斌斟酌情形辦理將此由六百里各諭令知之○諭明誼等奏收復奇台濟木薩城垣訥爾濟奏擊退疊撲巴城逆匪並收復奇台縣城及何瑄奏擊退回匪攻撲巴城各摺片此次賊匪糾眾在巴里坤三十里堡肆擾經何瑄等督率滿綠民勇奮力攻剿足以寒賊膽而快人心本日已降諭旨將何瑄超擢巴里坤總兵該員自當感激殊恩力圖報稱卽著訥爾濟商同協守不得以賊氛已遠稍涉疏懈古城奇台等處見經收復其安設旗綠官兵及一切善後事

宜並著訥爾濟妥籌辦理聯捷等軍疊諭迅速出關計日即可西
征著訥爾濟仍遵前旨飛速迎提以厚兵力其古城等處克復詳
細情形並著查明具奏鎮迪道文麟退避何處竟無下落殊出情
理之外卽著訥爾濟查明辦理奇台縣知縣恆頤請撥礮位火藥
明誼等因前已解赴巴里坤未經再解自是慎重之道卽著訥爾
濟察看情形如奇台須用礮火酌量分撥巴里坤餉需支絀儻各
省協餉有解至烏里雅蘇台地方者卽著明誼等設法妥解毋稍
延緩將此由六百里諭知明誼麟興車林敦多布訥爾濟並傳諭
何瑄知之○予河南陣亡委參領隆喜等祭葬世職○丙申賜張
蜀錦等八十四人武進士及第出身有差○諭軍機大臣等林鴻
年奏昭通大路未清見在催兵催餉以圖進取暨憑陳支持急切
情形各摺片並由軍機處將咨到岑毓英原稟呈覽滇省糜爛朝

廷久深軫念茲據林鴻年所陳餉項支絀同情叵測各節自係實在情形滇省利源既爲回眾把持餉項支絀日甚一日梁士美挫歸臨安岑毓英困守曲靖乞援更急而昭通一路道路崎嶇匪蹤充斥既須帶練前進又非餉項充足不克鼓行而前各省欠協滇餉及川省欠餉部定釐金津貼各款業經諭令該省督撫等迅速籌解著林鴻年分投咨催但能湊有成數即可妥籌布置次第舉辦遴派妥幹員奔赴昭選練以備前驅楊先芝既據該撫奏稱爲回中出類之才誓滅杜逆卽宜畱心察看加意籠絡當可爲該撫指臂之助川省情形固屬艱窘但滇事如此棘手理當設法代籌以資接濟著崇實駱秉章懷遵疊次諭旨將積欠餉銀並部定釐金各款酌量勻撥以濟急需毋得視之漠然致林鴻年有所藉口岑毓英固守曲靖與回眾仇隙日深楊盛宗已馳往東川密探消

息暗爲曲靖聲援卽著飭令該員加意控馭籠絡毋稍疏忽所請
另刊木質關防卽著刊發雲南藩司木質關防一顆札交岑毓英
斟酌開用以昭信守勞崇光疊經催令赴滇見在行抵何處久未
據該督奏聞著卽懍遵前旨飛速起程赴滇與林鴻年商辦進止
機宜毋得藉故遷延致干重咎將此由五百里各諭令知之○丁
丑諭軍機大臣等前據軍機大臣等奏籌剿馬賊章程當經諭知
恩合等知照伯彥訥謨祜於蒙古官兵一體照辦茲據該親王告
假回旗已經允准卽著傳諭該親王於行抵科爾沁揀選得力蒙
古兵丁扼要駐紮按照軍機大臣等奏定章程遇有奉天熱河等
處馬賊竄入蒙古地方協同剿辦並傳知蒙古各旗王公等一體
截擊卽由伯彥訥謨祜督同各該盟旗商酌辦理蒙古官員有能
擒獲著名盜首及斬梟盜犯多名者准該親王奏請獎敘從優給

以升銜升階翎支兵丁等給以六品至九品頂帶功牌卽照軍功
例請獎儻兵弁藏匿賊犯並知而不首者卽行奏明按照窩盜罪
名懲辦如或盜犯畏懾兵威伏而未動該親王等所備蒙古兵丁
雖不必輕於攻剿亦當購覓眼綫嚴拏著名首犯儘數懲辦奉天
熱河等處如派有兵役越境至蒙古地界緝賊亦卽幫同協拏如
有擒獲賊犯協拏之蒙古官兵亦准一體獎敘其安分良民並著
通行曉諭照常安居嚴飭兵弁等不得妄拏驚嚇如良民能辦理
團社協助兵弁立功亦准其同列獎敘以昭獎勸伯彥訥謨祜當
深體除暴安良之意於奮勇之中仍寓謹慎之心以副委任軍機
大臣等奏定章程繕鈔給閱看將此諭知伯彥訥謨祜並著理藩
院傳諭沿邊各盟蒙古王公等知之○以神機營操練整齊予醇
郡王文祥等議敘免已革副都統博崇武遣戍○予江西傷亡參

將周尙福等祭葬世職○停山東本年例貢果品○戊戌諭軍機大臣等劉長佑奏差竣回省日期一摺見在捻氛南竄豐沛惟賊蹤飄忽奔突靡常劉長佑仍當督同李鶴年暨在防文武加意備禦毋稍疏懈至遵遷各處兵丁及各路派出員弁前曾有旨令歸福興調遣此時福興業已回京各該處駐紮官兵不可無大員統率著劉長佑選派得力之員擇要駐守居中調度以免紛歧其巡防一切應辦事宜該督當與徐廷楷等妥速籌辦毋稍遷延將此諭令知之○己亥諭軍機大臣等恩合奏賊匪闖入興京並擬將徐占一等股匪招撫密陳地方積弊邊外賊勢籠絡徐五情形並覆陳勦辦章程各摺片覽奏曷勝憤懣恩合前在奉天勦捕盜賊素稱勤奮何以此次漫無防閑致令興京重地被匪闖入劫獄戕官又未能卽時將賊股殲除任其竄逸實屬玩忽著卽交部議處

城守尉清凱疏防賊匪闖入咎無可追惟到任後卽值賊氛四起且常川駐守陵街尙無疏虞著從寬免其議處被劫之監犯若干名係何項罪犯並著恩合查明辦理至徐占一等股匪旣稱投誠必須責令先將烏痣李等首犯擒獻方不至再有反覆此次官兵與賊接仗並未見該匪大受懲創亦未見徐占一等將他股首犯擒斬自首恩合僅憑徐占一有投首之說遽行停止調兵恐此事尙無把握徐占一旣稱投誠應令其將他股首犯設法擒斬方准其贖罪自新再能續有擒獻或隨同官兵出力卽可與兵役等一體論功給獎如此辦法庶與軍機大臣等前奏相合如徐占一但以投誠爲緩兵計或仍暗中勾結並非出自真心則恩合仍當督飭兵勇實力剿捕不准將就了事至賊匪人數究有若干該省兵力餉需是否足恃該署將軍務當據實具陳不得以粉飾含糊

致誤大局如兵力實不敷勦辦卽著迅速奏明候旨調撥至所稱擬調吉林黑龍江官兵一節吉林兵力僅能自顧黑龍江兵徵調各處太多均難再調計惟有天津所練之洋槍隊及神機營所練之威遠槍礮各隊並在京練習之吉林黑龍江各隊均曾經行陣頗有紀律堪以調用卽著恩合奏明辦理斷不可存不肯借助於人之見致誤事機徐五股匪投誠後旣稱安靜著卽責令奕榕等妥爲駕馭毋任滋生事端恩合見旣回省卽須將應辦事宜加意整頓省城監獄聞羈犯太多亦不可不加意嚴防趕緊清理富平阿帶兵出省能否得力亦著恩合酌量辦理將此由五百里諭令知之○諭聯捷奏接准雷正綰來文懇請另賞差使並請將雷營勇丁移防楚豫暨餉需支絀未能西行各摺片雷正綰所部潰變聯捷前奏內曾有叛將孤恩請旨勦辦等語朝廷料知雷正綰受

恩深重不至喪心病狂至於此極是以疊降諭旨責令收集潰散
擒斬叛首並令專摺奏事想該提督具有天良必能感激圖報相
機勦賊以贖前愆今聯捷又忽稱雷正綰恐與楊岳斌不合士卒
懷疑等語與前奏雷正綰背叛各情既屬自相矛盾於見辦情形
亦顯然相背著毋庸議至稱雷正綰所部勇丁請調赴楚豫防勦
一節尤屬自逞私見越分妄陳著不准行楊岳斌當傳知雷正綰
令其知感知奮收合散卒簡練精銳重振軍聲力圖報稱果能殺
賊立功朝廷仍當宥其既往沛以恩施正不必自懷疑懼另求差
使也聯捷因軍糧不繼將隊伍分赴收降各村令降眾等輪替輸
糧殊屬非計儻兵勇徵求不已必致降回怨望激成事端尙復成
何事體著楊岳斌即將該軍餉需軍火等項籌定數目源源接濟
俾得趕緊西行聯捷有此軍餉卽當懷遵疊次諭旨迅速前進不

得藉口遷延致干重咎將此由六百里各諭令知之○予興京陣亡通判劉景醇祭葬世職○庚子諭內閣馬新貽奏覈減漕南浮收禁革陋規以肅漕政一摺浙省正漕前經降旨分成覈減並准部議以漕項籌抵運費皆所以軫恤民艱茲據馬新貽奏稱請將額外浮收痛加裁汰覈實酌畱耗餘辦公以蘇民困計杭州府屬共可減浮收米六萬四千六百餘石嘉興府屬共可減浮收米二十八萬五千三百餘石湖州府屬共可減浮收米十三萬六千八百餘石杭嘉湖三府南米共可減浮收折色錢二十四萬七千餘串從前一切陋規概行裁汰各等語卽著照所請將畱裁各款目造冊存案並著該撫等明白曉示勒石永禁漕糧概完本色其有情願完折者按照市價收納悉聽民便至杭屬之新城於潛昌化有不肖州縣仍敢蹈從前勒折浮收陋習卽著該督撫嚴參治罪

至所稱浙省大戶完漕並不加耗甚至有把持包攬等弊經此次改定新章之後紳民一律徵收不准有大小戶名目再分軒輊儻有紳衿等恃勢把持仍前包攬短交著一併從嚴參辦○諭軍機大臣等勞崇光裕麟奏苗匪竄擾黎平府境見飭文武集練勦辦並咨湖南廣西等省派兵赴援張凱嵩奏南甯賊尙負嵎督兵出省勦辦各一摺貴州苗匪股數眾多見句結古州敗匪併趨黎平一路東西北三面皆賊官兵力薄恐成燎原之勢著張亮基裕麟督飭署古州鎮黎平府認真防守毋令深入爲患一面就近添募勁練力圖勦洗仍催令趙崇慶撥兵援應以遇兇鋒並著李瀚章張凱嵩就近檄飭防邊將士出境會勦不得稍分畛域南甯逆首孫芒廣等盤踞那檀山澤兩巢相持已久劉培一等雖屢次獲勝尙未得手張凱嵩見已出省督辦著卽由平梧一路進趨南甯沿

途布置督同劉培一覃遠璉等相機進攻該撫聲威所至壁壘一新定能剋期殄滅思恩軍務仍飭易元泰勦辦鎮安股匪迅令陳慶桂籌勦以期節節肅清用副委任裕麟奏病體難支請開缺調理一摺裕麟已有旨准其開缺回籍調理該護撫臥治數月尙能井井有條著俟張亮基病痊回任後再行交卸起程張亮基所奏遵覆被參各款一摺本日已有批諭該撫惟當勉益加勉以圖報稱見在病勢當已輕減著卽接印任事以便裕麟交卸回旗勞崇光見在何處逗畱著懍遵疊次諭旨迅赴滇省與林鴻年會商前進毋再遲延干咎將此由六百里諭知勞崇光張亮基李瀚章張凱嵩並傳諭裕麟知之○護貴州巡撫布政使裕麟奏病勢難支請開缺回旗調理允之○署貴州巡撫張亮基覆陳黔省公事均與總督勞崇光彼此籌商並未各存意見得旨所稱以後懲前隨

時檢束等語務當身體力行勉圖報稱毋得徒託空言致負委任

○予貴州陣亡署知州左茂森祭葬世職建祠○辛丑以賈臻爲

貴州布政使

前安徽布政使

○壬寅諭軍機大臣等閻敬銘奏擒逆回竄

二鄉魚臺見籌堵剿情形一摺擒匪任柱等糾眾數萬由東境南

竄被官軍截剿仍折回東境見在潘鼎新等軍俱已南征東省惟

有王心安等軍兵力尙薄恐未能繞出賊前著曾國藩迅飭色爾

固善等馬步各軍繞前迎擊毋令竄渡運河擾及登萊完善之區

該大臣前經慮及自當妥籌布置以紓朝廷南顧之憂閻敬銘務

飭王心安等實力追剿使該匪不得稍停喘息則口國藩追兵一

到即可併擊以期大加懲創見在軍情布置如何曾國藩久無奏

報並著迅速馳奏以慰廑繫清淮爲裏下河門戶擒逆不得遲志

東省恐仍思南竄卽著吳棠妥爲堵禦毋稍鬆懈該逆本有竄回

雉河老巢之供喬松年亦當加意防範毋任闖入致歸正各圩復被煽動東明等處水套餘黨未淨冬令水涸清理較易著劉長佑閻敬銘不動聲色派員妥爲經理毋令勾結爲患該督撫必應實力奉行不得敷衍了事一奏塞責正在寄諭間據吳棠馳奏遵旨派兵會剿各摺片所有吳棠派出之參將吳鳳柱等馬步各隊卽著歸曾國藩妥爲調遣其防守桃源各軍仍著吳棠督飭嚴防遇有賊蹤竄入卽行迎剿將此由六百里各諭令知之○諭瑞麟等奏賊竄和平等處見約閩軍會剿並查辦興甯縣屬土匪情形各摺片濂逆被江西官軍擊敗後回竄粵東闖入和平縣城經兵團擊退遂竄入連平州屬之忠信司復擾及長甯大蓆翁源邊界賊蹤飄忽異常粵省官軍總未能實力堵剿力遏兇鋒瑞麟等見派鄧安邦等萬餘人赴連平追剿王朝治等沿江扼守以顧韶州

並飭任星元等擇隘駐紮卽著嚴飭派出各員分投防剿毋令賊匪得以深入又形滋蔓惟賊蹤雖殘敗之餘醜類尙眾粵省兵力較單必須江閩援軍由龍川橫出連長會合粵軍痛加剿洗並著左宗棠察看軍情緊要卽仍遵前旨親自赴粵節制各省之軍以期事權統一劉坤一卽督令席寶田王開琳等軍越境會剿不得稍分畛域方耀奉派剿賊於賊抵龍南時並未出境追剿迨賊回連和又不馳往截擊實屬觀望遷延咎有應得方耀著撤銷提督銜暫行革職仍飭該員奮勇剿賊以贖前愆至興甯土匪助逆截劫閩軍前據左宗棠奏到已嚴諭瑞麟等查辦此次瑞麟等僅起出洋槍等件而首要各犯尙未查拏擒獲此等匪徒豈容倖逃法網卽著瑞麟等催令李福泰督同該地方官認真查拏務將該匪徒按名拏獲懲辦不准姑息諱飾敷衍了事將此由六百里各諭

令知之○癸卯諭內閣左宗棠徐宗幹奏勦辦上下府各屬土匪情形一摺福建興泉永漳各屬小刀會等匪黨素爲民害經左宗棠等派兵勦捕將首要各犯次第擒斬辦理甚屬認真仍著督飭地方文武實力搜捕以消奸宄而安善良永春州知州周式濂於上場堡埔頭鄉應拏匪徒日久未獲一犯輒請免其拏辦於發審之顏必魁一犯又復在押潛逃並請將該州紳士捐免坐賈銀兩作爲團費種種情節支離難保無有心賄縱情弊周式濂著先行革職暫畱本任勒令嚴緝要犯顏必魁到案審訊聽候查辦○左宗棠奏竊臣欽奉諭旨飭查廣東軍務貽誤情形臣查汪逆之竄踞鎮平本因計無復之姑假息於此爲賒死之計其必不欲久畱粵省者緣汪逆籍隸安徽全椒其死黨多江北江西湖廣劇賊而與廣東股匪氣類攸分也臣之遣康國器關鎮邦兩軍入粵以助

粵軍而分布各軍以助江西保湖南邊隘者蓋謂制流寇之要在審其必出之途同其竄動而要擊之庶可省兵力而策全效閩軍駐武平邊隘距鎮平縣城四十五里扼賊由閩竄江要衝廣東必欲催其入粵而粵軍之分攻鎮平者僅方耀一支又距鎮平百餘里迨閩軍分紮鎮平之東南北三面江軍進平遠遙扼其西北一面粵東所宜防者僅西南一面耳八月初五日長樂之賊既已獻城則粵軍卓興一支正可進扼興甯乃閩軍於八月初九夜復鎮平縣城卽躡蹤猛追六晝夜至羅岡已越興甯而前並未見方耀卓興之軍而龍川之賊反得與汪逆會合並趨一西長甯地界是粵軍徒有會剿之名而無會剿之實不圖方耀卓興之貽誤一至於此郭嵩燾所陳數誤自係實在情形瑞麟於方耀卓興不據實奏參又從而徇縱之此不能爲瑞麟解者也郭嵩燾廉謹有餘而

應變之略非其所長諭旨責其負氣責其不據實陳奏而稱疾乞

退是郭嵩燾咎由自取早在 聖明洞鑒之中至幕友徐灝劣蹟

臣無從查知自古用兵之際主兵者每因軍務繁重不得不廣辟

幕僚相助爲理然不得其人亦足誤事瑞麟信任徐灝而粵事之

誤如此則其不能得力亦可知矣再據高連陞函報八月二十五

六等日汪逆全股竄至江西定南信豐連界小江墟一帶經席寶

田婁雲慶等擊敗二十八日退竄龍南境內察度賊情又將假道

廣東南韶以犯湖南而入廣西 臣仍當督飭各軍探蹤截剿以期

早殄逆氛 上諭前因郭嵩燾奏廣東軍務數誤請將督署幕友

徐灝擯退當經降旨交左宗棠查辦茲據奏稱卓興方耀於賊匪

退竄之後屢次追剿遲誤並廣東省辦理軍務貽誤各情所延幕

友亦未得人各等語總兵卓興方耀屢以攻剿得力擢至專閫宜

如何激發天良力圖報稱輒敢因從前微有勞績竟致驕怯而瑞麟仍復遷就優容並不早加參劾殊屬非是著瑞麟郭嵩燾隨時察看如該總兵等始勤終怠卽著嚴行參辦不得稍涉姑息瑞麟郭嵩燾以督撫大員同城辦事自當和衷商酌乃瑞麟於郭嵩燾商辦之事未能虛心體察郭嵩燾因瑞麟未經允從負氣上陳所見殊小均著傳旨嚴行申飭儻經此次訓誡之後不思公忠爲國力改前非必將瑞麟郭嵩燾重治其罪瑞麟幕友徐灝旣不得力卽著驅逐出署不准在廣東逗留○諭軍機大臣等左宗棠徐宗幹奏勦辦上下府各屬土匪並左宗棠奏覆陳廣東軍務貽誤情形請將訪查事件另行派員查辦各摺粵東軍務正當防勦喫緊之時瑞麟於布置調度機宜自當虛衷延訪共濟時艱郭嵩燾亦當和衷商酌務求至當不得偏執己見此後該督撫遇有公商事

件總當以國事爲重毋許各懷私見再蹈前非方耀於軍務喫緊之際竟敢逗留不進縱賊竄逸實屬玩誤著瑞麟等飭令該總兵奮勉圖功以贖前愆儻再畏葸貽誤卽著嚴參治罪卓興如不實力剿賊亦著從嚴參辦毋稍姑息賊蹤見又回竄粵東該省兵力本不如閩軍之精銳且卓興方耀不善駕馭仍恐不能得力必須左宗棠親往督勦方可埽盡狂氛著左宗棠懷遵前旨迅行前往認真勦辦瑞麟前已有旨令赴潮州辦理李福泰是否可用有無粉飾貽誤之處左宗棠此次摺內並未提及仍著查明具奏閩省上下游各屬土匪橫行相沿成俗種種兇悖情形無殊叛逆左宗棠等見飭地方文武帶兵接捕擒斬多名餘匪始稍知斂息第積習既久驟難期其革心且兵至則伏兵撤則起尤爲該匪等慣技左宗棠等惟當飭令在事員弁隨時訪查拏辦以消其萌又擇廉

明守令遇事化導久任而變其俗庶沈痼之疾或可日有起色知州周式濂辦理土匪是否得賄徇庇著左宗棠等查明參奏左宗棠另片奏軍營染疫等語高連陞劉清亮劉典等軍患疫過半而康國器一軍爲尤甚該將士等爲國勦賊馳驅況瘁近因師行山谷枕戈露宿飽受煙瘴以致傳染疫氣物故頗多覽奏之餘曷勝惻惻著左宗棠宣布朝廷德意多方拊循妥籌醫治給發餉需俾得迅消疹癘益資飽騰以副軫恤戎行至意將此由六百里各諭令知之○甲辰諭軍機大臣等崇實奏教士被毆兇犯未獲請將署任知州及卸任知州摘頂勒緝一摺前因總理各國事務衙門奏四川酉陽州人毆斃法國傳教士並燒搶教民房屋當經諭令崇實駱秉章確查懲辦茲據崇實奏稱先有酉陽州教民張天興等具控張玉光等縱搶疊毆各情正在飭屬審辦復據報傳教士

馮弼樂自行前赴西陽住居城隍廟被不知姓名多人毆傷殞命
兇犯逃逸請將署知州等摘頂勒緝等語此案構訟業已數月該
署知州等並不上緊清釐致釀人命實屬貽誤前署西陽州事候
補知府董貽清見署西陽州事試用直隸州知州鄧清濤著一併
摘去頂戴勒限緝拏首從各犯及被控之馮仕銀等務期悉數就
獲從嚴究辦並將張天興等具控張玉光等各案趕緊訊明斷結
具報儻再玩泄卽行從嚴參辦前據法國公使呈遞照會知州
將馮仕銀等召至署內飲酒協謀屠滅傳教士馮弼樂前往撫慰
教民被馮仕銀張佩超宋文選等毆傷斃命之語是否屬實仍著
崇實駱秉章確切查明將兇犯悉數拘獲訊明辦理不得含糊草
率致貽後患田興恕究於何時起程曾否出境並著催令趕緊起
解毋許逗畱將此由五百里各諭令知之尋奏見經緝獲殺斃教

士正兇冉老五並打毀教堂暨張天興等房屋之劉勝超等訊明咨部定罪該州紳民願籌銀八萬兩賠償教堂及教民房屋自與教士劉嘉瑪議定立約完案至馮仕銀張佩超張玉光均無商謀滅教等情董貽清鄧清濤並無邀馮仕銀協謀之事已協同拏獲首從各犯應請賞還頂帶得旨董貽清鄧清濤均著賞還頂帶○乙巳諭內閣醇郡王奏特參不知敬謹之大員請旨懲處一摺據稱昨至弘德殿伺候讀書正值奕慶教習清文乃伊精阿並不侍立公然旁坐當卽揮令起立該侍郎不知敬謹誠恐日久相沿漫無體制謹據實糾參請予處分等語伊精阿著交部議處尋吏部議以降三級調用毋庸查級紀議抵得旨著加恩准其抵銷○諭軍機大臣等閻敬銘奏賊匪見竄單縣以西督軍追勦並由單縣竄赴虞城各摺片賊匪由銅沛回竄豐縣西折而北直犯魚臺經

潘鼎新等軍分路進剿該逆敗奔西南單縣之大油坊曹馬集俱有賊蹤據生擒賊供任柱賴汶洸兩股欲撲濟甯疊遇官軍擊敗刻仍欲竄河南等語見在該逆已由單縣興隆集竄赴虞城著閻敬銘督飭派出各軍乘勝越境跟蹤躡剿並著吳昌壽嚴檄在防各軍迎頭截擊會同東省官軍兩面夾攻務將此股逆匪就地殄除毋令匪蹤蔓延致剿辦益形棘手該匪乘閒奔竄剽疾異常非有精勁馬隊相輔而行勢必處處落後徒成尾追之局前諭曾國藩飭令色爾固善等馬步各軍繞前迎擊見在該逆已逸入虞城著曾國藩卽行檄飭色爾固善等迅赴豫境協同追剿迅掃賊氛並著劉長佑懍遵前旨飭令安住統帶馬隊迅速赴豫交吳昌壽調遣以資厚集賊勢已成流寇必須以有定之兵辦無定之賊方能制賊死命閻敬銘擬另籌一軍責令畱署費縣知縣王成謙統

帶以備攔擊卽著該撫飭令王成謙選派得力兵勇扼要駐紮毋得有名無實賊股見竄豫省非悉銳西趨與張總愚合股卽南竄光羅圖犯鄂邊以遂其奔突狡謀著官文鄭敦謹嚴檄在防將士認真堵禦越境迎剿毋存畛域之見虞城與亳宿一帶相距非遙難保該逆不由豫竄皖又肆鴟張著喬松年督飭官軍越境會同掃蕩以剿爲防殄除醜類此等狂寇東奔西竄朝廷實深南顧之憂曾國藩有節制三省之責務當統籌全局力圖剿洗以副委任而慰廑懷將此由六百里各諭令知之○丙午諭內閣戶部奏請飭直隸等省清釐交代一摺直隸省州縣交代各案前經譚廷襄酌定章程分別新案舊案立限清釐乃時逾多年並未依限結報各該州縣視爲具文任意積壓該管上司又復置而不問玩泄因循實屬不成事體著照該部所請所有直隸省各州縣交代著仿

照山東新章辦理將同治四年以前未結各案作爲舊案無論任數多寡統限三箇月將未完銀穀按員造冊逐案報部同治四年以後卽屬新案應依限結報二參逾限卽將該州縣奏參革職懲辦該管上司延不續報由戶部奏參照例議處其新舊各案分別已未完結定限半年彙奏一次如有應行扣展者隨時奏請儘屆限不奏卽將該總督藩司交部議處至結報章程無論正署各員總須各任分報不准累任統報以杜牽混並不得以駁改冊籍扣算時日巧脫處分一有虧款立時追繳亦不得以清出抵款批解爲辭巧飾虧那其軍需墊款總以覈准報部者爲憑不准籠統列抵蠲緩錢糧以奏銷到部者爲斷不准混作民欠如此明定章程嚴行考覈庶錮習可除藉資整頓其順天府屬熱河承德府屬交代著一律照辦卽由戶部將交代未結各州縣開單分別知照

該總督府尹都統等遵照辦理直隸爲畿輔近地積弊尙復如是外省難保無此等情弊著各該省督撫體察情形參酌山東章程一體認真查辦毋任不肖州縣暗虧國帑以肅吏治而裕餉源○曾國藩奏曹州之賊知濟甯防守甚嚴不能渡運河而東遂悉數南竄徐州分布豐沛銅山境內盤踞湖團一帶臣調張樹珊色爾固善等同軍追剿並調潘鼎新越境夾擊九月二十三日張樹珊等駐軍豐魚交界之谷亭紮營未定賊馬五六百匹突來撲犯我軍迎擊敗之追奔十餘里擒斬數十名二十八日臣派營務處李昭慶帶忠樸等營會同張詩日步隊烏爾圖那遜馬隊出剿徐州北境二十九日至柳新莊賊大隊南來見官軍步伐整齊且戰且走我軍追及於張谷山烏爾圖那遜馬隊從旁鈔擊副將黃金志衝其中堅賊勢不支紛紛敗竄追逐二十餘里偪入湖中淹斃百

數十名陣斬二百餘名生擒悍賊二十六名賊由劉家集西竄蕭縣而去色爾固善由豐縣回軍十月初一日行近蕭縣與賊邊馬遇於郝家集我軍分三路進擊賊卽潰敗追至胡家莊殺賊數十名臣意賊旣由曹而南竄徐州又由徐而西竄蕭碭勢必回顧蒙亳老巢不料賊於初二日又復折回豐縣與後股會合徧布城南十餘里是時鼎軍四營尙畱濟甯僅六營先到豐縣兵力甚單初三日潘鼎新帶隊赴陳家莊誘賊出戰殺賊一千餘人賊向西南狂奔竟夜不敢停宿折而北竄直向魚臺一路初四日適遇道員潘鼎琛由濟帶隊前來與賊戰於豐北潘鼎新復與王心安之軍馳往夾擊殺斃無算賊復敗竄向西路單縣而去查此次徐濟諸軍各有斬擒潘鼎新以孤軍當狂寇以步隊擊馬賊竟獲全功差足以寒賊膽惟該逆行走甚速乘虛蹈隙是其慣技當初竄東省

東華錄卷一百一十二
已有由青石關窺伺登萊之說見值運河水涸難保不潛行偷渡
潘鼎新一軍已全隊拔回濟甯防所臣飭張樹珊色爾固善暫駐
豐縣如賊久居曹屬該兩軍仍當齊赴山東如果渡運內竄再調
李昭慶率大枝遊擊之師赴東會剿以保完善之區又奏欽奉諭
旨副都統安住所帶馬隊著劉長佑飭令統帶赴豫交吳昌壽調
遣查擒匪見竄曹單與直隸之東明長垣一帶處處毗連霜降以
後黃河水淺歸槽礮船本屬無多轉瞬歲寒冰堅即可鋪草墊土
全河皆成坦途尤非礮船所能爲力黃河北岸汛地甚長日下祇
可增兵斷難減戍臣所以注重東路者以山東北鄰畿輔天下之
根本也南鄰江蘇臣軍銀米器械所自出楚勇淮勇之根本也賊
匪所以注重東路者以山東運河以北平行富饒不似豫皖之難
於覓食也若非數次痛剿而大創之則該匪斷不能忘情於山東

山東之事一日不鬆則直隸之防一日難弛相應請旨飭下直隸督臣劉長佑仍將副都統安住所帶馬隊調回駐守並須酌添步兵使將領皆知冬春之防甚於夏秋務保萬全是爲至要如果該逆因疊次敗挫不敢畱戀山東則必由曹單回竄河南俟其竄過開封陳州以西臣當一面具奏一面咨商劉長佑吳昌壽或調安住馬隊仍赴河南臣亦當添派大枝遊擊之師赴豫會剿奏入上命軍機大臣傳諭曾國藩劉長佑吳昌壽昨據閩敬銘奏稱捻匪由山東復竄虞城已諭曾國藩飭色爾固善馬隊赴豫追剿此次官軍雖兩次獲勝而該逆未受大創著曾國藩仍遵前旨嚴飭色爾固善等跟蹤追躡毋稍鬆懈吳昌壽有地方之責尤不可稍存推諉並著督飭各軍迎頭截剿毋令闖入河南腹地致滋蹂躪黃河水涸未宜減戍曾國藩所陳實爲根本至計卽著劉長佑札

飭安住馬隊仍畱直隸防守河邊不得稍有疏忽儻賊竄徐州以西則直隸防務較鬆仍著曾國藩察度情形妥爲調遣以資攻剿
○李鴻章奏欽奉諭旨令臣督帶楊鼎勳等軍馳赴河洛一帶防剿並顧山陝門戶臣再四籌思所慮約有三端一兵勢遠分也我朝從前武功專恃兵力此次軍務全資勇力臣初至軍營首聞周天爵琦善向榮和春諸臣之議論皆謂旗綠弁兵馴謹而易調遣各省勇丁桀驁而少紀律儻不得已而用勇就地召募隨時遣汰尙無甚流弊若遠調數千里外終必譁潰誤事咸豐初年廣西所募潮勇最多向榮張國樑等帶赴江南沿途騷擾卒至十年三月金陵之變一潰不可收拾自曾國藩江忠源胡林翼李續賓等創練楚勇不用一兵蓋深知綠營廢弛已久習氣已深萬不足以殺敵致果而以楚將練楚勇恩信素孚法制嚴密又由湖南北轉戰

江皖一水可通人地相宜是以歷久而能成功然李續宜唐訓方以楚勇勦淮北之捻劉長佑以楚勇勦直隸之騎馬賊均未大著功效則以離鄉太遠南北異宜勇性未能馴服何能得其死力曾國藩曾國荃有鑒於此故於金陵克復東南軍事將竣卽將所部湘勇遣撤但屬臣暫畱淮勇以備中原勦捻自係因地制宜夫捻匪係皖豫東三省無賴糾合而成其隸皖籍者大都潁亳蒙宿人皆在淮北臣籍隸廬州實在淮南所部淮勇則廬州六安安慶揚州人居多皆濱江處所於長江上下防勦最宜軍士戰於其鄉亦較得力其性情風氣與淮北迥殊同治元年臣初由安慶赴滬湘勇以去路太遠多不願從仍商之曾國藩就臣鄉里團練久戰之士選將束伍逐漸添募如程學啟劉銘傳潘鼎新張樹聲周盛波等始僅爲營官帶數百人耳嗣因打仗可靠各增募至數千人今

遂爲淮勇最勁之兵究之用於江淮南北千餘里內必可指揮如意若逐漸調移山東河南邊境尙能勉強相從若遠遠赴河洛山陝並豫備剿除京東馬賊甘肅回匪之用水土不習誠恐遷地弗良勇心渙散不獨素食穀米驟改麥麪一端爲可慮也且朝廷期望於_臣欲以西北軍事相屬不過以_臣在蘇蠶立戰功而_臣亦惟賴所部將士踊躍用命若令_臣去而平素慣用之健將勁兵不得隨行_臣復何能爲役曾國藩籌備徐州濟甯周家口等處防軍皆_臣部最出力者_臣若不調西行則聲勢不能大振若全調他往則東皖無以自立若另圖添募馬步而隨身先無親信可恃之兵勇必致敗軍債事而無裨於全局此兵勢不能遽分之實情也一餉源難恃也凡欲治兵必先足餉欲籌餉必先得人與地_臣自咸豐三年至八年皆在皖北軍中竊見和春鄭魁士之戰陣頗勇旋因

餉缺而潰袁甲三翁同書等繼之亦因餉絕而敗卽十年江南大營之潰十一年浙江之陷皆由於餉糧斷絕官文胡林翼籌鄂餉以供東征曾國藩進圖江皖以江西湖南廣東釐金爲餉源左宗棠以浙餉辦閩浙之賊臣以滬蘇入款辦江浙之賊皆能自我爲政轉輸不匱故得戡事曾國藩夏間奉命剿捻臣忝署江督卽以後路籌餉引爲已任以安其心數月以來分屯豫東蘇皖千餘里湘淮兵勇四萬餘人糧運供支源源接濟又兼籌蘇松揚州畱防各陸營長江外海各水師皖南北江西防剿遣撤各湘軍之餉雖以入抵出不敷尙多竭力勻撥幸無貽誤臣若奉旨西征見在前路剿捻後路分防各軍餉源當屬於何處籌餉當責成何人亦須先行計議若無確然可指之款率眾前行必難濟事若非切實可靠之人維持後路亦無以安曾國藩與臣軍各將士之心臣嘗默

籌熟計各省若以見餉養見兵約計河南可養戰士一萬五千山東可養戰士二萬安徽可養戰士一萬江蘇可養戰士六七萬湖北可養戰士四五萬各省督撫果皆熟諳韜略認真籌餉練兵使一兵得一兵之用通力合作勿存推諉爭忌之心則兵與餉可漸足一二年間可期奏效若 皇上專派督勦大員而各督撫謂事有專屬或擁兵觀望或玩視軍需或勝則爭功敗則諉咎遂使客兵出境種種牽掣亦難必其收功之遲速矣 臣若赴豫欲圖兜滅此捻必須多練馬隊以備衝突廣置車馬以資轉運需餉甚鉅豫中蹂躪已久力難供應若專指蘇餉目下蘇滬稅釐分供前敵淮軍已虞饑潰再添募馬步人數益眾道路益遠勢必不支 臣一經離任恐亦不能遙制此餉源不能專恃之實情也一軍火難常接濟也 臣軍久在江南勦賊習見洋人火器之精利於是盡棄習用

之擡槍鳥槍變而爲洋槍隊見計出省及畱防陸軍五萬餘人約有洋槍三四萬桿銅冒月需千餘萬顆麤細洋火藥月需十數萬斤均按月在上海香港先期採買陸續供支臣每親自料理又有開花礮隊四營一爲潘鼎新帶往濟甯一交劉秉璋鎮守蘇州其副將羅榮光劉玉龍兩營爲臣親兵見分守金陵城外之下關江東橋兩處江口洋礮重者千餘斤輕亦數百斤其礮具之堅精藥彈之繁冗臣講求數年稍窺秘要今若出省督師必須酌量調往惟礮隊所用器械子彈等項均在滬局製造儻因道遠解運不及臨敵不能應手將若之何此軍火不能接濟之實情也儻蒙聖明指示俾臣帶兵遠出日後更無掣肘之患臣得以效命疆場努力設謀幫同曾國藩等殲此殘寇雖萬死有所不辭上諭軍機大臣等前因捻匪竄擾南陽豫軍不能得力諭令李鴻章統兵西

征並令曾國藩等妥籌商酌不必拘泥諭旨務期事臻善美以副
虛懷下詢之意嗣據曾國藩奏稱南陽賊數較少宛洛之患稍輕
李鴻章所部淮勇均調赴東豫各處駐紮別無可調之師茲據李
鴻章覆奏瀝陳兵餉軍火各端恐難專恃與曾國藩所奏大略相
同該大臣等均能詳細縷陳使朝廷洞悉此中利害實爲有見見
在賊勢趨重廬城張樹珊等軍攻勦正急而南陽僅止張總愚一
股自不必再事更張卽著毋庸置議曾國藩務當督飭各軍迅籌
殲賊方略李鴻章駐守金陵督催前敵餉需軍火毋稍遲誤吳棠
於清淮情形最熟並著嚴飭防軍視賊所向迎頭截勦不令闖入
襄下河完善之區以副委任惟南陽捻逆豫軍旣不能勦除恐其
日久裹脅愈多前諭鮑超由襄赴豫嗣因官文奏稱該提督游勇
太多漫無紀律上杭之勇聞有赴豫之信恐引羣呼類而來請飭

仍赴江右第念鮑超勦賊向稱勇往若令嚴汰游勇妥加鈐束使該提督有儆懼之心未始不可資其攻勦官文恐鄂餉難支因有飭赴江右之奏著曾國藩李鴻章妥爲商酌於江蘇接濟數成餉需並令該提督將游勇嚴行裁汰不許任意招留卽札令赴南陽勦賊統歸曾國藩節制以一事權而資鈐攝儻事屬可行卽著一面札調一面奏聞用期迅捷將此由六百里各諭令知之○諭都興阿穆圖善奏先後准咨雷軍情形歧異請旨飭查並提督周顯承招撫潰勇籌辦防勦及攻勦甯夏情形各摺片雷正綰招集潰勇情形疊據楊岳斌楊能格等先後奏報均經諭令楊岳斌等傳知雷正綰收集潰卒擒斬叛首以贖前愆此次都興阿等因周顯承稟稱潰軍業已設法安撫均各悔罪駐紮平涼與前次德興阿等咨報潰變情形兩歧恐辦理不善激成事端請飭妥爲查辦等

語與疊次所降諭旨適相脗合卽著楊岳斌等督飭雷正綰周顯承將已收潰勇妥爲安撫責令將赫明堂一股攔頭截擊迅殄逆氛至雷正綰所部尙有二十餘營糧米軍火萬分缺乏儻不迅籌接濟難望其踊躍前驅著楊岳斌劉蓉楊能格就近趕緊設法籌解餉需以定軍心而維大局甯夏踞賊經都興阿等督飭馬步各隊分投雕剿並誘賊出城殲斃數百名踴毀賊圩數處仍著都興阿穆圖善激勵諸軍奮勇攻剿力拔城池毋得曠日持久虛糜餉項大同鎮總兵馬陞前據都興阿奏請暫畱甯夏軍營養傷本日據王榕吉奏磴口等處防務緊要請飭馬陞速赴山西統帶歸綏防兵如一時未能赴晉卽令帶兵就近會同桂成防守邊要等語著都興阿卽將馬陞所帶川勇一營另行派員接統迅飭該總兵剋日赴晉或卽令其統帶所部會同桂成力扼邊隘之處並著酌

量辦理將此由六百里諭知都興阿穆圖善楊岳斌劉蓉並傳諭楊能格知之○諭楊岳斌奏鞏昌甯遠被圍調軍援勦請飭陝西四川捐辦糧石派兵接替成祿等軍飭文麟隨同西征各摺片鞏昌甯遠兩城被逆回圍撲甚急楊岳斌已調曹克忠統帶所部前往援應該軍素稱勇往卽著飭令迅速進兵力解城圍將鞏昌一帶回匪次第掃蕩以固省城屏蔽一俟南路軍務稍鬆卽行分兵兼顧中衛之金勝關以遏賊匪竄路甘省糧餉缺乏朝廷早深廑念茲覽楊岳斌所奏各營至以麪水充飢情形至此殊爲可憫陝西本年秋收旣尙豐稔卽著劉蓉按照楊岳斌摺內所請各情體察該省上中二等州縣設法捐辦麥糧運至甘省源源接濟並著於邠乾鳳翔邠州各屬先提倉糧四萬石運交秦州涇州慶陽等處俟該省捐有成數再行歸款四川之保甯一郡毗連階州運糧

較近著崇實駱秉章於該府所屬籌捐米糧一萬石運赴階州以資軍食該將軍等當力顧大局迅速籌辦不得稍有推諉楊岳斌摺著鈔給崇實駱秉章劉蓉閱看靜甯平番等處已經楊岳斌派兵扼紮即可騰出成祿聯捷兩軍會合西行著楊岳斌飛催成祿等剋日起程由肅州一帶掃蕩而前出關剿賊不准再有逗畱鎮迪道文麟以催兵爲名擅離職守著交部議處並著楊岳斌飭令該員隨同成祿等迅卽出關協同剿賊以贖前愆將此由六百里各諭令知之○予哈密傷亡署辦事大臣扎克當阿祭葬世職○丁未諭內閣楊岳斌奏據陝西紳士候選道雷致福等稟稱降調陝西巡撫劉蓉自莅任以來疊遇賊匪竄近省垣及甘省潰勇東竄均能不動聲色派兵勦辦地方得以安堵全陝倚若長城今聞以事去官遐邇驚疑據情代奏並據片內聲稱劉蓉爲甘省籌餉

籌糧不遺餘力一旦解任甘省亦失指臂之助藩司林壽圖實心
任事不避嫌怨等語前派瑞常羅惇衍馳赴陝西查辦事件於劉
蓉林壽圖品行才具及平日居官聲名若何民情是否愛戴辦理
軍務吏治是否合宜自必確有聞見著卽據實具奏毋稍含糊○
戊申諭軍機大臣等昨據楊岳斌奏靜甯平番等處已經派兵扼
紮卽令該督飛催成祿聯捷刻日起程由肅州出關剿賊不准再
有逗畱關外待兵甚急察哈爾土爾扈特等兵因官軍未到仍復
散歸游牧聯捷屢次催令出關迄今年餘尙復徘徊觀望藉甘省
兵事爲名遷延不進實屬不知緩急見在靜甯等處俱經楊岳斌
派兵扼紮無須成祿聯捷等在彼勦辦著楊岳斌嚴行傳諭迅催
成祿聯捷刻期出關不得再事遷延儻仍前玩忽卽著該督據實
具奏候旨懲處不准稍有回護已有旨將聯捷調補哈密辦事大

臣榮全補授伊犁參贊大臣聯捷等務懷遵疊次諭旨奮勉出關節節進剿馳赴哈密任事勿謂言之不豫也懷之愼之本日據楊岳斌奏回匪闖入馬廠搶掠孳生馬匹戕害牧兵及省城糧價日增請酌定麪斤銀數扣除勇丁月餉各一摺甘州回匪變亂該馬廠員弁自應加意防範何以任令該匪由大俄博竄入搶馬至三百餘匹之多雖經把總韓天福追回一百餘匹而所失仍復不少非尋常玩忽可比代辦甘肅提督印務署中軍參將張敬總理甘州孳生馬廠大馬營遊擊楊逢春把總韓天福均著交部分別議處其被搶馬匹卽著責令疏防之將弁分成賠補以示懲儆甘肅省城糧價昂貴若將勇丁日支麪斤照時價扣還士卒不免苦累著照楊岳斌所請自本年九月初一日起所有各營應支白麪每斤作銀三分三釐三毫卽於月餉內扣還其不敷價值並准作正

開銷該軍士沐朝廷格外體恤之恩自當倍加感奮著楊岳斌激勵諸軍分投勦洗務將各路回逆剋日殲除毋得坐耗餉需致孤委任楊岳斌請調道員王嵩齡差遣已諭令李鴻章知會彭玉麟速飭該道赴甘其副都統金順能否赴營教練並寄諭都興阿酌量調派如金順不克前往由該將軍另派妥員訓練至請飭陝西撥解曹克忠月餉及請飭湖北湖南運解火藥等項各片已分飭該督撫迅速籌解矣將此由六百里各諭令知之○諭楊岳斌奏請調員訓練馬隊等語據稱該營將弁多係南中管帶水師步隊於騎戰之法皆未能勝教習查有西安左翼副都統金順見在都興阿軍營熟於馬隊堪以教演該營見到有錫林郭勒盟所撥馬一千匹必須訓練成軍方足以資勦回之用著都興阿卽飭金順迅赴楊岳斌軍營隨同操演一俟該營馬隊技藝嫻熟卽令金順

回營如此時金順實在不能前往卽著都興阿於所屬將弁中選擇得力可靠之員迅飭前赴該營實心訓練不得以無員可遣爲辭稍存推諉將此由五百里諭令知之○諭李瀚章奏楚省西路官兵於黔邊疊次戰捷並涼雪圍解見籌剿辦情形一摺黔賊出擾涼傘雪洞苗教各匪乘閒勾結銅仁告急經周洪印等督軍擊退羅建章等赴援涼雪之軍克解重圍剿辦均尙得手見在銅仁教匪雖經擊敗退伏狗牙場難保不復圖大逞而雪洞敗匪亦尙盤踞平亞距涼傘不及百里自應及時剿辦著李瀚章督飭周洪印等趁賊鼠伏之時趕將病疫各勇妥爲遣撤醫調另補精壯訓成勁旅以備進剿並催令遊擊劉啟富一軍移紮田埂坪杜賊由銅竄楚之路俟周洪印督兵駛至剋期約會銅城文武協力兜圍先將教匪蕩平再剿平亞苗匪以靖地方張亮基裕麟均有地方

之責著卽督飭派出之軍及銅仁文武會合楚軍認真勦辦不得
專恃容兵坐視不問致干重咎另片奏續籌楚邊東路防勦情形
劉連捷朱洪章二軍已至南安與江閩各軍會勦儻賊偪湖南邊
界自應星馳回援等語汪逆殘股由江西竄廣東之連平和平等
處去湖南較遠援江各軍可以毋庸調回著卽咨會劉坤一就近
調度以資得力其參將彭炳武等四營已由桂東移至桂陽並著
飭令陳士杰妥籌扼紮慎固邊防毋稍疏忽將此由六百里諭知
張亮基李瀚章並傳諭裕麟知之○已酉 上詣 太廟東轅門
外綵幄恭閱 孝淑睿皇后 孝和睿皇后 宣宗成皇帝 孝
穆成皇后 孝慎成皇后 孝全成皇后 孝靜成皇后 文宗
顯皇帝 孝德顯皇后 玉冊 玉寶 尊藏於 太廟後殿○
諭軍機大臣等明緒奏接奉諭旨覆陳軍務情形一摺伊犁東面

各城均被回匪占踞北面頭臺果子溝亦被回匪扼要紮營數座阻截援兵來路南面冰嶺迤北纏頭回子全行叛亂惟西面卡外直達俄境而卡內之哈薩克布魯特復與回匪勾結滋擾伊犁當兵單餉絀之際四面受敵困苦情形實深廛繫本日已寄諭成祿聯捷等剋日督兵西進迅速出關不准再有延誤明緒惟當就見有兵力激勵拊循固守危疆以副委任至伊犁餉銀疊經諭令明誼廣鳳等將已到銀兩迅派委員設立臺站多備駝馬由俄國邊界趕緊運赴伊城想該將軍必能恪遵妥辦至明誼等截留餉銀三萬兩仍令解送伊犁著明緒派員迎提以濟要需左營城池被圍明緒派兵援救將士等均能奮勇進戰敗賊解圍深堪嘉尚出力官弁兵勇卽著由明緒隨時查缺升補以示鼓勵將此由六百里諭令知之○庚戌諭軍機大臣等劉長佑奏擬派大員統帶弁

兵巡防邊隘一摺灤陽等處駐紮之兵經劉長佑酌量移調勢難聯絡著卽飭令各該將弁督率兵勇按期會哨加意操防以備緩急近來馬賊均在八溝哈達錦州一帶出沒無定遷安縣爲東北邊牆適中之所徐廷楷見署提督本有駕馭將士之責卽著照所請責成該署提督暫駐遷安統帶各路官兵居中調度實力巡防嚴防馬賊蹤跡隨時剿捕毋稍疏懈其附近各州縣著劉長佑嚴飭力行保甲整飭民團以期有犯必獲綏靖地方另片奏安住馬隊見已起程俟察看情形再行飭調回駐河干等語安住馬隊旣已起程卽著劉長佑咨令該副都統前赴豫省暫歸吳昌壽調遣仍著該督察看情形如果必須調回再行飭調回駐河干以資防禦將此諭知劉長佑並傳諭徐廷楷知之○諭傳諭署固原提督雷正綰雷正綰奏縷陳被誣並潰勇未有圍撲涇州情事各摺片

雷正綰所部因餉缺思變前據德興阿劉蓉具奏接據地方官稟報有捆殺固原州知州蔣牧及圍攻慶陽之語德興阿劉蓉疑非事實於摺內陳明雷正綰平日性情尙非強橫之比何至狂悖至此是劉蓉本無偏信地方官稟報率行陳奏之處朝廷亦深鑒該提督積功擢至專閫必思保全令名斷無跋扈情事嗣據劉蓉等馳奏代爲剖析各情俱已明白諭知何以雷正綰積懷疑慮曉曉陳辯想因旁人挑唆所致該提督本係武員亦卽毋庸深責嗣後惟當懷遵疊次諭旨約束兵丁奮勉圖功不准稍有成見其營中疲乏勇丁亦當酌量遣撤庶餉需易於供支不至再生事端回目赫明堂旣據奏稱打仗奮勇卽著飭令奮勉立功儻或仍懷異志亦毋許稍涉回護其義子馬永和假稱赫明堂之名率眾竄擾甚屬可惡卽著雷正綰設法擒拏毋任竄逸正在傳諭間據劉蓉奏

擒獲叛將胡大貴供稱雷正綰兵變時雷恆首先勒令開隊李高
啟倡製大旗胡大貴亦隨同謀叛嗣覺事體不好乘間脫逃固原
州官並未戕害各等語固原州知州蔣方直未經潰勇戕害是雷
正綰心迹已明惟胡大貴所供雷恆李高啟倡亂各情雖係一面
之詞但不訊明辦理則浮言愈多此事關係該提督聲名諒必急
於剖析劉蓉已經交卸卽著將雷恆李高啟二員解交陝西聽候
趙長齡質訊則胡大貴之狡飾無可置辨若稍有回護之心則必
致議論紛紛雷正綰尙屬明白事理必能深體此意也○諭雷正
綰奏自陳感激圖報並餉缺兵潰情形暨周顯承等架詞捏陷各
摺片劉蓉奏逆回竄擾平涇搶劫糧餉派兵勦辦情形並拏叛將
胡大貴暫行監禁各摺片逆回孫義洪等竄擾平涇搶劫糧餉雖
經周顯承派兵擊退而該逆黨與旣眾詭譎異常且占踞固原密

布營壘勢必伺隙旁竄著劉蓉飭令周顯承等督率各營認真防堵並飭劉玉興五營與涇防諸軍聯絡聲勢以資備禦至周顯承招撫十餘營人數過多劉蓉動撥楊岳斌解存涇庫餉銀三萬兩暫資散放並由劉蓉楊能格各撥餉銀麪糧運濟嗣後應源源籌解至雷正綰平涼各營餉絀日久亦恐難支著楊能格趕緊籌撥餉銀陸續接濟並製造帳房若干運涇備用以利攻勦雷正綰自陳感激圖報情詞甚爲懇摯惟憑陳被人誣陷尙多懷疑過慮之處本日已諭令奮勉殺賊以贖前愆並將雷恆李高啟等迅速交出解陝交趙長齡秉公審辦藉明心迹著趙長齡於雷恆等解到後認真研訊務得確供胡大貴一犯卽照劉蓉所請暫行監禁胡大貴供內聲稱逃赴隆德將情形稟知總督楊岳斌派秦國勝收撫等語是否確實並著楊岳斌查明具奏成祿奏率師西行一摺

已諭令迅速前進鶴齡一軍著楊岳斌派兵接替令其隨同成祿
出關成祿等軍餉需楊岳斌隨時接濟前據涇州知州林發興稟
報因原州知州蔣方直被殺各情本日劉蓉奏查明蔣方直並未
被害是該員前此稟報不實林發深所得以道員補用之案著卽
撤銷將此由六百里諭知楊岳斌趙長齡劉蓉並傳諭楊能格知
之○降調陝西巡撫劉蓉奏遵查張集馨通飭各屬不准擅動錢
糧應付軍餉及因恐內潰不准兵勇入城均非專指李雲麟一軍
而言惟於李雲麟布置動多駁斥致令呼應不靈未免迹近膜視
其飭參將胡文勝等營歸周有全統轄徑札營官未咨主將亦屬
近於鈐制至所參張集馨受陸塋私惠周有全資緣陸塋並陸塋
餽賊滅口情事查無確據見在張集馨業經革職李雲麟兵勇亦
已遣散均請免其置議龍常帶勇赴防尙無逗畱滋擾李雲麟剿

賊山陽竇因糧餉不繼未能窮追並非飾詞報聞○辛亥諭內閣
前據楊岳斌奏陝西紳士候選道雷致福等稟稱降調陝西巡撫
劉蓉勦辦賊匪潰勇均能得力藩司林壽圖實心任事不避嫌怨
當經降旨交瑞常羅惇衍於前赴陝西時聞見所及據實具奏茲
據奏稱劉蓉秉性樸實惟吏治尙未熟習自負亦間有過高而辦
理軍務有膽有識本年七月間甘肅潰勇竄入陝境劉蓉調撥兵
勇不動聲色將首犯捕戮其餘遣散歸伍甘肅逆同時經東竄劉
蓉分兵布置居民恃以無恐林壽圖操守甚好辦事認真實能任
勞任怨惟馭吏未免過嚴參劾屬員間有輕重失當致招謗毀各
等語陝西自遭兵燹以後地方殘破兼以甘肅逆同時經竄擾必
須知兵大吏方足以資鎮率劉蓉簡任陝西巡撫已經數年地方
情形俱能諳悉既據楊岳斌奏稱民情愛戴而瑞常羅惇衍亦稱

其辦理軍務潰勇均臻妥善地方安堵詎可因語言小過遽令閒退自應俯順輿情以期裨益地方劉蓉著仍帶革職畱任處分署理陝西巡撫趙長齡卽著赴山西署理巡撫印務降調陝西布政使林壽圖著來京另候簡用○王子以升祔禮成祫祭 太廟上前期親詣行禮○諭軍機大臣等醇郡王奏校閱各旗營操演漸著成效請各歸統率並恭繳諭旨一摺據稱該王所管神機營並兼轄練兵約三萬名一切操演隨時校閱均能漸著成效綠營操演亦頗整肅前值畿疆有警未敢固辭今旣七鬯無驚不宜重旅久擁請將見隸神機營官兵仍由該王等訓練其各旗營所練兵丁卽由見管操演之護軍統領等自行督率教練巡捕五營由步軍統領等辦理如有升遷事故卽由各該旗營都統副都統等自行酌覈辦理請毋庸兼轄節制並將五月初一日諭旨一道敬

謹封繳等語覽奏具見該王小心寅畏不自滿假之意惟各旗營操演數月以來甫有規模尙未一律精整若俯從該王所請恐各旗營統率無人前功仍墮除神機營官弁兵丁由醇郡王等日加教演外所有京師旗綠各營兵丁仍著醇郡王隨時稽查校閱勤加教練務期悉成勁旅用以拱衛神京如各旗營查有不知振作及始勤終怠之員弁卽由該王據實嚴參毋稍姑息其各旗營管理操演之都統副都統護軍統領等嗣後如有升遷事故著由直年旗隨時奏請改派至每年春秋校閱各旗營向由閱兵大臣辦理見在所練各旗兵丁除由醇郡王隨時稽查校閱外仍著閱兵大臣一併閱看毋得視爲具文繳回諭旨一件畱中將此諭令知之○諭吳昌壽奏官軍兩路進剿獲勝賊匪折竄東北肅陽髮捻回竄豫境王榕吉奏豫省捻蹤圖竄嵩洛籌備河防各摺片張總

愚股匪由魯竄西竄圖犯嵩洛因偵知西路有備折而東趨經張學醇馬德昭等迎擊於禹州新鄭等處疊次獲勝見在馬步各賊尙在長葛地方著吳昌壽卽飭張學醇馬德昭等軍由鄆陵洧川兩路跟蹤躡剿毋使該逆得以喘息蕭颺髮捻回竄豫之睢州邊馬擾及杞縣等處是已由虞城逐漸而西誠恐與張總愚一股趨併且黃河見當冬令水涸尤恐伺隙搶渡剿辦更形棘手吳昌壽見調駐守河洛之兵回駐祥符蘭儀一帶嚴扼河防誠屬要著仍當檄飭在防各軍會合山東追剿虞城竄賊之軍兩面夾攻毋使乘間深入色爾固善等馬隊疊諭曾國藩檄赴豫境著卽飭令馳赴睢杞一帶繞出賊前以扼奔突其安住馬隊已據劉長佑奏起程赴豫並著吳昌壽飭令迎頭截剿嚴扼賊由蘭考北竄之防毋誤事機王荅吉所奏捻蹤北趨各情自尙未悉賊已由禹郊折而

東竄惟逆蹤飄忽靡常晉豫一河之隔隘口紛歧尤不可稍涉大意著王榕吉仍飭和昌蔣臨照等覘賊所向就近量移擇要添布以臻周備賊蹤去鄂雖遠官文鄭敦謹仍當嚴檄鄂邊將士越境設防以備迎剿毋得稍存畛域之見吳昌壽另片奏總兵張曜呈請回籍歸葬等語張曜著賞假四箇月准其回籍歸葬其所部各營卽飭接管之總兵保英妥爲整理以資得力將此由六百里諭知官文曾國藩吳昌壽鄭敦謹並傳諭王榕吉知之○諭勞崇光裕麟奏苗匪竄擾黎平府境見經兵練擊退一摺貴州清江廳逆苗竄至黎平府屬東北兩路攻陷驗洞後分紮大步河等處西路之匪盤踞寨蒿地方並分股攻陷育洞均爲官軍扼截未能闌入附近之張寨沖復有難民劉洪等聚眾勾結苗逆約爲內應經署知府徐達邦派官兵圍捕將劉洪等擒獲正法復督飭兵練分投

進剿斃賊甚多當將大步河等處收復餘匪敗往天柱縣境亦經
楚軍截剿竄歸幫洞等老巢其西路育洞踞匪並經官兵設伏夾
攻殲斃多名餘黨均向唐冷逃竄防剿尙屬認真惟此股逆苗傾
巢出竄並敢勾結內應意圖窺伺黎平府城蓄謀甚狡見雖被官
軍擊退難保不乘隙復來著勞崇光張亮基裕麟督飭該處文武
嚴防各隘毋任匪蹤紛竄並著李瀚章張凱嵩速飭沿邊防軍一
律相機援應毋稍疏虞將此由五百里諭知勞崇光張亮基李瀚
章張凱嵩並傳諭裕麟知之○癸丑飭各省迅解本年軍餉○嚴
諭奉天整頓捕務○甲寅諭軍機大臣等恩合奏遵籌調兵撥餉
以資攻剿及匪首徐占一投誠各摺片寶珣奏官軍剿匪失利添
募壯勇一摺此次股匪由遼陽州屬之嶺廠地方竄至距奉天省
城二十五里之王大人屯官兵接仗失利該匪向省城迤北竄逸

見飭恩科統帶馬隊跟蹤追剿惟賊勢猖獗奉天額設官兵不敷調撥自應添調客軍以資攻剿該署將軍請調之神機營訓練吉林黑龍江馬隊一千名並備調之洋槍隊一千名已諭管理神機營王大臣安速議奏其請撥部庫銀十萬兩亦諭知戶部速議矣恩合務當於京兵未到之先就見有兵力督飭將弁實力攻剿不得稍有疏懈奉天庫存銀兩准其先行動用第官軍在王大人屯接仗失利情形恩合聲敘甚屬含糊帶兵各員亦未加參劾未免意存徇隱何以作士氣而飭戎行著恩合破除情面申明賞罰以期力加整頓剋日殲除匪首徐占一如果真心投誠自應相機辦理但不可爲其所愚恩合務當虛心體察以昭詳慎烏志李旣無投誠實據官兵雖不便輕於緝拏致徐占一懷疑或責令徐占一擒獻或督烏志李隨同剿賊立功自效均著恩合酌量辦理不得

草率了事復生後患見在賊匪究有幾股首逆何名未據恩合奏聞並著查明具奏王起一股匪數尙多率眾出邊見在何處著阜保德英一體嚴防賊匪雖向省北竄逸而根本重地不可不嚴爲防範著富平阿寶珣妥爲籌防所募壯勇並著認真訓練以期得力恩錫計可抵任卽著商同籌辦毋稍大意將此由六百里各諭令知之○以延煦爲盛京兵部侍郎

由內閣學士遷

○乙卯諭軍機大臣

等都興阿奏攻剿喫緊請畱幫辦大員並陳剿賊情形及請調黑龍江馬隊各摺片前因雷正綰所部潰散陝西喫緊特允德興阿等所請諭令穆圖善帶領所部馬隊馳赴邠長協剿見在雷營潰勇漸次撫定而甯夏攻剿正值緊要之時穆圖善著仍畱甯夏幫同都興阿相機攻克以資得力惟據都興阿奏稱賊糧垂盡止賴納家牖一帶賊堡接濟兼恃牛羊孳多藉充賊食杜嘎爾等雖有

勝仗究未能斷其接濟著都興阿穆圖善督飭兵勇或於星夜設法焚其糧食或於逆賊通道派兵扼紮使之不得運往則攻克自必較易該將軍等進攻年餘尙未得手若再遷延則師老財匱尤屬可虞著卽迅速攻克以慰馳繫黑龍江馬隊調撥已多未便再行調往西蒙克西克所部馬隊前諭馳赴陝西見在如果情形較鬆卽著德興阿劉蓉迅飭仍回甯夏以期兵力較厚拔城更易甯夏旣克則陝防北路亦可稍鬆諒德興阿等必能顧全大局也將此由六百里各諭令知之○以左副都御史景霖爲馬蘭鎮總兵官○丙辰諭內閣萬青藜卞寶第奏官荒地畝擬試墾水田請飭議籌辦一摺據稱甯河縣與天津縣交界地方有荒地六七十里曠無居人地力廢棄可惜查甯河等縣所屬塌河淀軍糧城等處濱臨海河若引水灌溉可開稻田一千餘頃歲可收稻米十數萬

石於北地倉儲近畿民食均有裨益請飭侍郎崇厚派員履勘會議章程請旨辦理等語咸豐年間科爾沁親王僧格林沁在大沽海口一帶興辦水田倡捐辦理得稻田四千二百餘畝嗣經崇厚督員經理使斥鹵之區成爲沃壤民利賴之今甯河天津交界地方查有荒地數十里經卞寶第函致崇厚詢訪情形並據該侍郎覆稱軍糧城一帶臨傍海河但須開渠二道官爲籌款招佃墾種可得稻田千餘頃該侍郎連年在鹽水沽一帶勸墾水田收穫頗豐自必確有把握卽著崇厚派委妥員會同地方官前赴軍糧城一帶履勘情形酌議章程會同順天府府尹直隸總督奏明請旨辦理以興地利而裕民食○諭張之萬奏籌備上南祥河兩廳險要工程請酌撥節省防險銀兩一摺河南上南廳鄭州下汛等處本年疊出險工均經搶護平穩惟轉瞬春融水長隄埝塌墊堪虞

亟應豫籌經費物料以濟要需見經張之萬於鄭州下汛十堡十一堡估需銀五萬餘兩祥符上汛十五堡估需銀四萬餘兩內力加覈減必須添撥銀六萬兩始敷辦理要工所陳自係實在情形著吳昌壽按照該河督所請迅速飭令藩司於新章司撥二十萬兩外再撥節省防險銀六萬兩並前任河督譚廷襄奏准定章年前應撥料麻四成價銀一併勒限於年前全數解交張之萬俾得及時趕辦毋許稍有延緩其南岸下南廳及兩岸長隄各工並著張之萬隨時察看情形認真經理○諭軍機大臣等喬松年奏豫境竄賊又復東擾見在布置情形一摺張總愚股匪由邾縣禹州新鄭日漸東趨擾及許州洧川漸將竄至陳州歸德距潁州甚近喬松年見調英翰一軍駐紮潁州府屬之插花廟張得勝一軍回駐潁州相爲犄角黃秉忠一軍改駐西陽集程文炳一軍仍駐雉

河集卽著督飭派出各軍分路設防遇賊卽擊毋令匪蹤闌入喬松年務當激勵將弁越境迎截以剿爲防方能與豫軍協力進攻爲一鼓聚殲之計賴汶沆等股已由東境竄入豫省之虞城一帶若與張總愚勾結合股勦辦更形棘手應如何分路進攻之處著吳昌壽相機布置曾國藩節制三省責無旁貸著懷遵疊次諭旨統籌全局抽撥勁旅赴豫協勦迅殄逆氛將此由五百里各諭令知之○廣江西分宜縣學額六名湖北應山五名廣東清遠二名○撥山東地丁銀四萬兩天津山海東海關稅銀各二萬兩濟盛京軍需○丁巳諭內閣前因湖南已革巡檢李際晟呈控知府李逢春挾嫌參革訐告前湖南巡撫毛鴻賓納妾通賄等款當經諭令官文提集人證秉公審辦茲據訊明定擬具奏此案已革巡檢李際晟呈控前署湖南長沙府知府李逢春爲私黨楊鼎勳謀缺

及包庇劣幕並買倡爲妾賄息椿齡控案主使毛鴻賓密計行賄等款經官文提到李逢春楊鼎勳及委員江肇成千總張玉恩等逐一訊究並無實據質之李際晟亦稱得自傳聞無可指證道員康明哲並無謀逆之案亦無與李逢春結拜師生情事均著毋庸置議其所控李逢春等合買一妾獻於毛鴻賓等情查係毛鴻賓官親李文藻買得張姓家婢女役使惟毛鴻賓以風憲衙門任聽官親央媒買婢擡入署內致滋物議實屬關防不謹降調兩廣總督前湖南巡撫毛鴻賓著交部議處暫革知府李逢春雖查無藉查驛站需索零陵等縣銀兩情事惟於大荆驛巡檢等出具驛站遲誤印加各結漏填年月未經查出駁斥辦理實屬顛預李逢春著開復暫行革職處分仍交部議處其專轄驛站之前湖南按察使倉景恬著一併交部察議李際晟以被罪微員捏款誣控例應

加等治罪業已病故著與甘結內漏填月日之已故湘陰縣知縣
吳逢泰均免置議○戊午諭軍機大臣等吳昌壽奏官軍剿賊獲
勝髮捻大股竄往西南派隊追剿並憑陳豫省軍務萬難情形各
一摺張總愚股匪與賴汶洸牛落紅各逆合股同向西南紛竄經
馬德昭等督兵夾擊逆匪敗竄奔至許州一帶復經善慶等馬隊
迎擊斃賊十餘名生擒石法有一名見在該逆前股由襄城葉縣
擾及舞陽後股則由臨潁奔逸鄆城西平遂平一帶其勢方張著
吳昌壽督飭張學醇宋慶等馳赴南陽馬德昭由臨潁鄆城兩路
探蹤相機追剿遇賊卽擊毋令得容喘息官文等屢有派兵會剿
之奏僅於鄧州等處報一勝仗並未深入豫境會合豫軍將賊匪
痛加懲創是該督等會剿之說不過敷衍了事有名無實見據吳
昌壽奏賊匪石法有供稱賊有欲往湖北擄糧之意官文鄭敦謹

務當飭令防邊各軍越境赴豫迎頭截擊並飭各路將領協力嚴防毋令賊蹤竄入鄂疆儻再因循從事不知振作必惟該大臣等是問鮑超一軍前諭曾國藩酌量調赴豫省如果於豫省有益卽著迅速檄調以資得力皖省防務仍著喬松年嚴密布置吳昌壽所陳豫省軍務種種棘手勢處萬難自係實在情形該省地當四衝備多力分兵餉兩絀見在張總愚股匪與賴牛等逆併聚豫省賊數益眾斷非一省兵力所能支曾國藩本有節制三省之責自當統籌全局前往援應且江皖兵力較厚此時又無捻蹤竄擾所有原設四旗兵勇自應移向西進步步進逼以期力遏狂氛該大臣亦當斟酌情形移營進紮就近督剿未可株守一隅致誤事機豫兵不習火器無以制賊蘇省所制火器較爲精良著李鴻章將洋槍鉛丸火藥酌量提撥派員迅解豫省並著曾國藩李鴻章各

揀派熟習火器弁勇赴豫交吳昌壽調遣令其教演豫兵俾利攻
勦吳昌壽所陳供職無狀自請治罪並請另簡賢能等語該撫受
恩深重自當力爲其難不得以兵餉兩絀遽思推諉卸責吳昌壽
原摺並著鈔給曾國藩李鴻章閱看將此由六百里各諭令知之
○兵部等部議覆署兩江總督李鴻章奏皖省漸就肅清分汛設
防擬復舊制先行募補守兵五成照例籌給糧餉應如所請辦理
至所請皖南鎮總兵係新設之缺應否添立幾營查見當帑項支
絀之時未便添營糜餉應令就所轄徽甯池廣蕪采各營中酌改
增定其官弁俸薪馬乾口糧准照壽春鎮例定成額支給從之○
己未諭內閣據都察院奏江蘇職員章啟勳以母舅鄒鳴鶴遇害
最慘懇請優卹建祠等詞赴該衙門呈遞前任廣西巡撫鄒鳴鶴
於咸豐二年因賊匪圍攻廣西省城旋往北竄該員堵禦不力奉

旨革職旋賞給六品頂帶協防江甯省城殉難後復奉 旨賞

給道銜照道員陣亡例議卹鄒鳴鶴以革職之員在本籍守城殉難業經照道員例賜卹無可再加該職員所請優卹建祠之處著毋庸議○予文祥假三月回旗迎養並賞人蔭六兩○庚申諭內閣麒慶奏熱河地方幅員遼闊吏治不振請將調補舊例量爲變通並揀發州縣各員一摺該都統所請將熱河道以下正印各官除承德府知府仍專用滿員外其餘俱照內地官員滿漢以及何項出身一體補放之處著該衙門妥議具奏其請揀發州縣各員著吏部照例辦理另片奏請飭熱河道每年分巡各屬及都統帶兵出巡等語熱河道一員本有分巡之責該處轄境遼遠民風犷悍自當隨時周歷彈壓以靖地方嗣後著熱河都統札飭該道遵照定例每屆春秋二季分巡各屬以昭嚴密不准性耽安逸視爲

具文其熱河都統亦著於每年不拘時令酌帶駐防官員兵丁出巡一二次以期盜賊斂迹應如何擬定章程之處著該都統奏明辦理尋奏熱河道本有分巡之責擬以二八月爲率應飭自行妥議章程覈辦至都統出巡事屬勘始籌定章程略倣內地督撫查閱營伍之制每年帶印通巡所屬一次早則四月遲則十月往返以一月爲期隨帶委員及馬隊弁兵不得越五十人之數以資差委而昭簡便所有簡練兵丁訪緝盜賊巡歷所至自應嚴飭遵行下部知之○諭軍機大臣等醇郡王奏酌擬統兵大員帶兵前往奉省剿賊並請飭各該省總督將軍等派兵兜剿等摺奉省馬賊猖獗恩合前請調吉林黑龍江馬隊官兵九百餘員名業經有旨令神機營王大臣派赴奉省茲據醇親王奏此項官兵除傷病外止八百餘員名尙恐不敷調遣天津洋槍隊雖亦可用而東豫軍

務未竣畿南之防未可稍懈似須畱津備調擬於該營見練威遠隊官兵內選派一千二百名並小隊技藝兵二百名又直東遣撤之健銳火器等營內馬隊三百六十餘員名一併派赴奉省助剿並調定安管帶健銳等營馬隊以上各起馬隊官兵均派福興統帶督剿尙書文祥見在賞假回旗請令就近督同福興恩合商籌剿賊機宜等語所籌甚屬周妥著卽派福興管帶吉林黑龍江馬隊及威遠隊槍兵小隊技藝兵並定安訓練之健銳等營兵剋日分起前進赴奉省督剿文祥昨有旨賞假回旗迎養該大臣於奉省地理形勢風土人情均極熟習著卽與福興恩合等妥商剿賊之法有應奏事宜由該大臣隨時具奏以一事權定安見署伯都訥副都統本日已有旨令其迅速折回矣此項京兵起程除由京備帶餉需口分外其應用車輛卽著恩合寶珣劉長佑嚴飭經過

地方官員先期寬爲籌備屆期妥速應付毋得遲延短少致誤軍
行行抵奉省界內並著恩合寶珣慶春督飭奉省派出各兵勇爲
先路之導務須埽穴擒渠廓清地面不得恃有京兵遂可置身事
外京兵未到以前如果賊勢猖獗恩合等惟當就見有兵力實力
防剿總須先將 陵寢省城加意保護不可稍有疏虞阜保等亦
當飭令各軍越境會剿毋令匪蹤闖入該匪出沒無常此拏彼竄
是其慣技直隸熱河等處本有派出防剿之軍著劉長佑麒慶長
善連成徐廷楷等各飭兵弁實力防範仍多設偵探如有被匪被
剿窮竄闖入本境卽行派兵截拏毋得任令肆擾致干重咎並著
恩合知照伯彥訥謨祜暨各盟蒙古等一體兜剿務使該匪無所
潛蹤用收一勞永逸之效本日據長善奏查看迤北各邊口大概
情形開單呈覽一摺據稱邊牆不必一律修整致煩工費惟須寬

籌緝捕經費常川會哨再就各營內挑備緝捕盜賊精壯馬兵一枝一聞探報立即會合帶往與見在辦法尙合著卽會同劉長佑認真商辦毋得徒託空言馬隊槍操尤須認真校閱以期一律精練麒慶奏拏獲紀盛汶所供之辛三應否解京等語辛三及伊子辛榮第既與紀盛汶所供未盡脗合且經鋪民等紛紛具呈保釋似屬無干卽著無庸解京由該都統酌覈辦理其宋家杖子鄉長辛有剛是否與匪徒來往其住宅之西北有無客店並著密派委員訪查妥辦前據醇郡王奏派出吉林黑龍江馬隊官兵所乘馬匹間有倒斃疲瘁業由神機營挑選更換其不足之數或沿途續有倒斃疲乏請飭錦州副都統在大凌河馬羣內更換挑補著慶春卽於大凌河馬羣內挑選臚壯馬匹以備更換不准以疲乏充數將此諭知管理神機營王大臣並由六百里諭知恩合阜保德

英慶春寶珣劉長佑麒慶長善連成並傳諭徐廷楷知之○諭劉坤一奏粵東上坪踞逆宵遁和平見飭各軍東馳截擊並催鮑超督師進剿各摺片汪逆敗回連平州之上坪等處經席寶田等軍分路夾擊該逆始竄龍南之分水坳爲團練擊退遂於十月初九日夜糾黨由泃頭竄往和平劉坤一見飭席寶田王開琳劉勝祥越境會剿並令黃少春一軍迅赴長甯節節設備力扼該逆分竄之路所籌均尙周妥著劉坤一就近嚴檄各軍會同閩粵官軍分路進剿協力兜拏爲一鼓聚殲之計瑞麟郭嵩燾務當督飭將士嚴密堵禦遇賊卽擊迅殄逆氛毋得專待客兵致誤戎事該逆奔突無定難保不由平遠鎮平以犯汀州應如何扼要設防杜賊回竄著左宗棠徐宗幹妥籌辦理鮑超不日卽可到贛見在汪逆東竄和平江省定南長甯會昌等處正在堵剿喫緊之際卽著劉坤

一知會鮑超統率婁雲慶等軍星速前進視賊所向疾馳痛勦鮑超新募四營應需餉項並著劉坤一督飭藩司竭力籌出俾資接濟至該營所開薪糧公費等項與湘楚各軍月餉數目多有參差應如何覈實支放以歸畫一之處著咨明曾國藩妥商辦理將此由五百里各諭令知之○辛酉諭軍機大臣等崇實等奏援黔官軍獲勝並攻克逆巢一摺劉嶽昭一軍進勦黔匪連日將牛角垵元旨寺等處賊巢攻拔擒斬首目甚多遂乘勝馳抵遵義府城進解火石坎民寨之圍連戰皆捷附近脅從各寨均已就撫劉嶽昭復督飭諸軍將綏陽城外之天台山賊巢攻拔勦辦尙屬認真惟遵郡四面皆賊雖經官軍疊次擊敗仍在綏陽一帶負隅抗拒亟應次第掃蕩以靖地方著崇實駱秉章督飭劉嶽昭速統各軍進克綏城赴援遵郡並著勞崇光張亮基裕麟檄飭署遵義府知府

張日崙及綏陽縣官兵團練合力進攻迅殄醜黨毋得專恃客兵
應援一籌莫展坐失事機將此由五百里諭知崇實駱秉章勞崇
光張亮基並傳諭裕麟知之○追予陝西殉難知州金玉麟知縣
周蕃壽巴彥善於漢中府城合建三烈總祠○予貴州陣亡參將
李方元等祭葬世職○釋已革阿克蘇辦事大臣縣性回旗○是
月蠲免四川松潘廳被擾積欠額賦